

## ALLIANZA DAL CLIMA

## Verd-liberals vesan schanza sin sez cun la colliaziun

La Partida verd-liberala collia sias glistas per las elecziuns naziunales da l'october cun la Verda e la PS. Quai cuntrari a la strategia da la partida mamma che prevesa en sia strategia ina colliaziun cun partidas dal center. L'Alleanza dal Center grischuna è trumpada da questa colliaziun.

RTR/FMR

La Verda, ils verd-liberals e la Partida socialdemocratica dal Grischun èn danovamain s'unids ad ina colliaziun da glistas per las elecziuns federalas dals 22 d'october 2023. Cun quai vulan las partidas dar paisa a la politica da clima en il chantun da turissem e da muntogna, sco che las partidas han communitgà la mesema damaun.

La finamira da l'uschenumnada «Allianza dal clima» saja da dar ina paisa maximala a las vuschs che giavischian ina politica ecologica e progressiva, hai num vinavant. Las trais partidas èn avertas per ulteriurs partenaris da colliaziun da glistas.



Las trais partidas furman in'allianza per dar ina paisa maximala a l'ecologia. FOTO MAD/RTR

## Gia per la quarta giada ina allianza cun la sanestra

Gia il 2011, il 2015 ed il 2019 è la Partida verd-liberala dal Grischun sa colliada cun la sanestra, quai cuntrari a la strategia naziunala e dad auters chantuns. Il 2011 eri cun questa strategia perfin reussi da recaltgar in sez verd-liberal, quai cun Josias Gasser. Restà a Berna è el dentant be ina legislatura.

Il 2019 ha l'allianza da PS, Verda e verd-liberals puspè gi success, questa giada cun recaltgar in segund sez socialdemocratic cun Sandra Locher Benguerel. L'ambiziun dals verd-liberals era stada lura da turnar enavos en il Cussegl naziunal e quai anc ina giada cun lur candidat Josias Gasser.

## Impedir che la PPS survegnia il sez

Avant quatter onns n'hai betg mancà uschè bier che ils verd-liberals avessan fatg il tschingavel sez enstagl da Sandra Locher Benguerel (PS). Cunquai che lezza na candidescha betg s'augmentan las schanzas verd-liberals da gudagnar quest sez cun Geraldine Danuser: «Matematicamain avain nus be ina schanza sin in sez en il Cussegl naziunal sche nus ans colliain ad ina 'Allianza dal clima' cun la PS e la Verda», di la presidenta da la partida grischuna e topcandidata verdliberala.

Igl è dentant tut auter che segir che l'Allianza dal clima segirescha dus sez. Avant quatter onns è la Partida populara svizra betg stada uschè lunsch davent cun lur dumber da vuschs. La cursa per il tschingavel sez vegn probabel er questa giada ad esser stretga. Andri Perl, il president da la Partida socialdemocratica grischuna di en quest connex: «Nus vulain en mintga cas impedir che la PPS survegnia quest sez. Nus cumbattain per noss segund sez ma essan era pertschert ch'ils verd-liberals pudessan sorprendere quel.»

## L'Alleanza dal Center è trumpada

Era els avessan gugent vuli sa colliar cun la partida verd-liberala. Ed els sajan trumpads, di il co-president da l'Allianza dal Center Kevin Brunold. Ussa sajan els en discurs cun autras partidas burgaisas. Sisum sin la glista sajan ils liberaldemocrats, dentant era las partidas dretgas PPS e la Partida evangelica grischuna pudessan esser pussiblas partenarias da colliaziun. Ubain ch'els restan insumma dal tut sulets, lezza varianta detti senz'auter era anc.

## GRISCHUN

## Albertini banduna la Polizia chantunala

Il vicecumandant Gianfranco Albertini vegn a bandunar la Polizia chantunala dal Grischun per il cumenzament da l'onn proxim. Il motiv per quest pass sajan differenzas persunalas e tematicas insuperablas cun il cumandant Walter Schlegel, scriva il chantun en ina comunicaziun. Pervia da questa situaziun vegn Gianfranco Albertini a remetter sia funcziun directiva gia questa stad. Cun Gianfranco Albertini bandunia ina personalitad cumprovada cun reputaziun naziunala la Polizia chantunala. Durant set onns è Gianfranco Albertini stà inquisitur tar la Procura publica, dapi 22 onns schef da la Polizia criminala e sco ultim vicecumandant da la Polizia chantunala dal Grischun. (cdm/rtr)

## Ina giatta cotschna ed intelligenza artificiala – en discurs cun il poet

«Terra pels peis» da Linard Bardill è gist or da stampa. Il cudesch lyric en vallader e tudestg vegn preschentà questa saira a la vernissascha en la libreria Lüthy a Cuira. La FMR ha visità l'autur en ses atelier a Scharans ed el ha tradì intginas ponderaziuns ch'el haja fatg cun scriver duas poesias.

CLAUDIA CADRUVI/FMR

Cun leger ina poesia fan patratgs turnighels. Associaziuns sautan ringaraja. Ina poesias po evotgar in sentiment u regurdar ad in mument emblidà. Ma èsi propi il vair? Èsi ils medems patratgs che l'autur sez ha fatg durant scriver sia poesia? U manegia lez forsa insatge tut auter?

Durant la visita da la FMR lascha Linard Bardill filar a moda spontana ses patratgs tar duas da sias poesias.

*No surgnin bainbod ün giat  
o il giat survain a no  
quai nu saja precis  
a la fin dals quints n'ha eir jau  
surgnü üna vita  
o forsa listess viceversa  
la vita ha surgnü a mai*

*Lura vess la vita  
tut ün ris-ch  
ter bluord*

*Chi saja sco chi vögla  
jau m'allegri sil giat  
e sper  
cha' giat varà plaschair da mai*

Naschida saja questa poesia cura che sia famiglia spetgava in giat, di Linard Bardill. «Ti na pos decider co che quai gnarà cun quest giat.» Ed uschia raquintia la poesia dad ina vart da la fidanza en la vita e da l'autra era dal ristg da la vita.

## Il ristg d'ina relaziun

«Il ristg che questa vita porta a nus umans è dad esser pront da prender si contact cun tgi ch'igl è. Quai è listess sch'igl è in giat, in bostg, in uman u mia figlia che sto far in test en scola ch'ella è segira ch'ella va be giu per l'assa. Il ristg da la vita è da confruntar cun relaziuns, dad esser pront e perdet dad ir en ina relaziun.»

E per turnar tar il giat che ha ispirà la poesia: La finala saja quai stà ina giatta cotschna ch'è vegnida tar ils Bardills. «In'orma da giat. Incredibel. Ina giatta che guida la dunna da far lavur da terapia e che sesa adina là nua ch'i dat problems. Ina giatta da tschel mund», di Linard Bardill.

Igl avess era pudì esser auter, in giat che sa dispaia adina cun auters giats. Quai saja il ristg dad ina relaziun. «Ma il ristg da restar sulet e senza relaziun è bier pli insupportabel.»

## I sburfla or dal cor

«Quant jent» è il titel da la segunda poesia. Ella cumenza cun rimas che regordan l'emprim bunamain a quellas d'ina chanzun d'uffants ed ella daventa vers la fin adina pli filosofica.



Fabular e chantar è ses grond dun tant per rumantsch sco per tudestg – Linard Bardill preschenta in nov cudesch. FOTO CLAUDIA CADRUVI

*Jau less esser la leivra  
chi cuorra  
tras la planüra cuvernada da naïv  
il floc da naïv chi salüda sin fanestra  
Quant jent fiess jau la glüm  
chi splendura illa s-chürdüm  
la foura aint il müer  
il spazi tanter las stailas  
il vöd tanter ils atoms*

*Jau nu sun quai  
e sun listess tuot quai  
jau vez il muond suot meis peis  
co ch'el sburfla  
our da la chombra zoppada  
da meis cour*

A la dumonda co che questa poesia saja naschida, regorda Linard Bardill a la meditaziun dals zens. Cun lezza empovian ins da cuntanscher in stadi dal esser vid – quai reusseschia sin il pli per in mumentin.

Da l'autra vart haja mintga uman la capacita da crear en sai l'entir univers u insumma tut quai ch'exista sin il mund, forsa ina lieu sco en la poesia. Uschia statti scrit en la poesia, i «sburfla tut or da la chombra zuppada da mes cor».

## Cor u «sammelsuri da savida»

Quai saja in miracul. E là tegnia l'umanitad sin distanza l'intelligenza artificiala. Lezza saja in sammelsuri da savida. «Ma noss cor è in lieu nua ch'i vegn creà il mund, l'univers, la via da

latg. Jau nun ha uschè tema da l'intelligenza artificiala. Ella farà in grond battibugl. Ma sche nus nun ans laschain metter in pigna avain nus bunas schanzas da surviver quai.»

Il sammelsuri da sapienza na saja betg uschè potent sco la forza da l'amur, da la glisch e da la creaziun, di Linard Bardill.

E tut questas ponderaziuns – e numerusas autras associaziuns da lecturs e lecturas – han plaz en paucas lingias e paucs plets d'ina curta poesia.

La vernissascha cumenza gievgia saira da las 19.30 en la libreria Lüthy a Cuira. Astrid Alexandre fa musica.



«Terra pels peis – Den Füßen ein Grund» da Linard Bardill cumpara en la Chasa editura rumantscha.

## SVIZRA – ITALIA

## Italia ratifitgescha cunvegna da cunfinarias e cunfinaris

Il senat talian, cun 120 commembers preschents, ha ditg unanimamain gea a la nova cunvegna da cunfinaris tranter la Svizra e l'Italia. L'intent principal da la cunvegna è d'evitar in'imposiziun dubla da taglia. Uschia duai la Svizra salvar en l'avegnir 80% da las taglias a la funtauna che vegnan incassadas sin la paja da cunfinarias e cunfinaris talians. Ils cunfinaris che cumenzan lur lavur suenter che la cunvegna va en vigur duain vegnir suttaless a la taglia ordinaria er en il stadi da domicil ch'ha lura d'evitar in'imposiziun dubla da taglia.

La chombra dals deputads taliana aveva gia ditg gea l'entschatta matg. Cun la decisiun dal parlament talian vegn la Svizra er stritgada da la glista naira dals paradis da taglia. Var 77 000 lavurantas e lavurants talians traversan mintga di il cunfin svizzer en direcziun Tessin. La gronda part dad els vegn da la Lombardia. (rtr/fmr)



Nova cunvegna da cunfinaris tranter la Svizra e l'Italia. FOTO MAD